



1. april 2009

Inatsisartut suleriaasianni § 36, immikkoortoq 1 naapertorlugu matumuuna imaattumik Naalakkersuisunut apeqquteqarpugut:

Apeqqut: Rusland Qalasersuarmi pissaaneqarnerulerumalluni aammalu Qalasersuarmi pisuussutinik piginnittutut inissinnissaminik sulissutiginninnerminut atatillugu immikkut sakkutuuliinissaminik pilersaaruteqalersimanera aallaavigalugu Qalasersuaq pillugu Kalaallit Nunaata Danmarkillu sulissuteqarnerat allannguuteqartinneqassava?

(Inatsisartuni ilaasortaq Knud Kristiansen, ATASSUT)

Tunngavilersuut:

Nunarpassuit Qalasersuarmik "piginnittuunertik" uppersarniarlugu FN-ip Havretkommissionianut tunniussassamik 2014 killigalugu suliaqarput, tassanilu Danmark annertuumik, nunarput sinnerlugu peqatigalugulu, akuuvoq.

Nunarpassuillu Qalasersuup pigilernissaanut ilungersuuteqarnerannut tunngaviuvoq ilimagineqarmat nunarsuarmi gas-nik uulianillu pisuussutit tamakkerlugit 15 procentii qalasersuarmi nassaassaasut. Mannalu tikillugu nunat akunnerminni pissuserissaarlutik sulinerat aarleqqutigineqarsinnaasorinarpoq tassunga killeqaleraluttuartoq.

Rusland-immi illersornissamat siunnersuisoqatigiivisa Qalasersuaq pillugu pilersaarutaat pisortatigoortumik saqqummiunneqanngikkaluartoq nunarsuarmi tusagassiorfiit, pingaartumillu Rusland-imi tusagassiorfiit

uppernarsarlugu paasisimavaat Rusland Qalasersuarmi aammalu Qalasersuup pisuussutaanik uumaatsunik isumalluuteqarnerulernissani siunertarlugu annertuumik pilersaaruteqartoq.

Pilersaarutit ilagisimavaat Qalasersuarmi immikkut nakkutilliisussanik Rusland sakkutuuliiniartoq tusakkallu kingulliit naapertorlugit Rusland-ip aamma NATO-p akornanni Qalasersuaq pillugu saqitsaannerit annertusiartorput.

Ilisimaneqartutut Qalasersuaq pillugu aammalu Qalasersuarmik pisuussutaanillu piginnittussaaneq pillugu paaseqatigiinniarnert aammalu isumaqatigiinniarnert imaannaanngitsut ingerlanneqarput, ATASSUT-millu iluarisimaakkatsinnik Kalaallit Nunaanni Naalackersuisut aammalu Danskit Naalackersuisui suleqatigiilluarlutik suliaq pingaarutilik ingerlappaat.

Taamaattorli pissuserissaarluni oqaloqatigiinnerit qalliinnarlugillusooq Rusland-ip Qalasersuarmi sakkutuutigut annertusaaniarnera ilungersunarluinnartuusoq ATASSUT-mit nalilerparput, taamaammallu Qalasersuaq pillugu Kalaallit Nunaata Danmarkillu sulissutigisaasa killiffiat aammalu Ruslandip iliuuserisai tunngavigalugit Qalasersuaq pillugu sulissuteqartneq allannguuteqartinneqassanersoq paaserusullugu matumuuna Naalackersuisunut apeqquteqarpunga.